

آرام جانيم

گل ای آرام جانيم یوخ داها طاقت بو هجرانه
گؤرورسن توش اولوب عاشق لرین هجرینده افغانه

نقاین کشف ائله گؤستر جمال جلوۀ طوری
عیان ائت آیت انی انالله پور عمرانه

آچ اوزدن برقعون والشمسی تفسیر ائله نورونلا
داغیت تئل - تئل تئؤکولموش طرۀ طراری یان یانه

عیان ائت مصحف رویون اوره کلر شادمان اولسون
کؤنول لر ای گؤزل بو طول غیبت دن دؤنوب قانه

سواد زولفون اتمیش روز گارین تیره عشاقین
سنی تاری ظهور ائت تار اولوب سنسیز بو کاشانه

شب قدر وصالین بدر رخسارین لا روشن قیل
دؤنه اول بارقه نله بیر گولوستانه بو ویرانه

گؤزو آغلار قالب مین لرجه یعقوبون فراقیندا
عزیزیم رحم قیل یعقوبه دؤن گل بیت الاحزانه

دوشوب ماهور و دشته بی نوا عاشق شور ایله
همایون فر وصالین ائت عطا بو خیل گریانه

کنار ائت چهره خورشیددن اول زلف شبریزی
اؤزون بو ليله هجری یئتیر ای ماه پایانه

منیم آهیم محاق اولموش مه رخسارینا ای مه
اولوب هاله او زولفون آهیم ایله ماه تابانه

جهانسوز آهیمین جانا شراریندن حذر قیل کیم
نه تکجه ربع مسکون قورخورام دریالر اودلانه

آصیلیمیش بیدق غم قلعه بخته شها سنسیز
اودوزدوم پاک نقد عؤمرومو لیلاج هجرانه

یارانمیش یانماغا چون شمع سنسیز رشته جانیم
او شمعی گرچه سندن آیری قویدوم راه طوفانه

آتاق دونیانی گر سن گلمه سن ای دُرچ گوهر چون
اگر گنجینه یوخدورسانه یه لازیمدی ویرانه

یانار اولدوز کیمی هر عاشقین بیر سو ده، رحم ائيله
سن ای ماه سپهر حسن بو جمع پریشانه

گؤزون بیماریم بیمار گؤز! درمان نیاز ائتمه
خوشام من درد عشقینه نیازیم یوخدو درمانه

آلار جان بیر اشارتله گؤزون مندن گؤزون قوربان
اؤزون اینجیتمه آماج ائتمه جانی تیر مژگانه

نگاهین برقی اخگرلر آتیب دیر خرمن کفره
اگرچه کفر زولفون رخنه صالمیش ملک ایمانه

نیبه جور مخالف دن دؤنوب عشاقی ترک ائتدین
قاییت! خصمی گؤزل غمزه نله مغلوب ائيله ترکانه

قیامت دیر او گون قائم قیام قامتین گؤرسم
هلا قائم قیام ائت غالب اولسون وصل هجرانه
غم آلمیش قلعه می ای شهسواریم دستخون اولدوم
کؤنول بو ششدر غم دن چیخا هیهات بیر یانه

صایتلیم قول کیمی بازار عشقینده بویون قوربان
بویون قویدوم سنین زنجیریوه رحم ائت عزیزانه
طریق عشقده طرار تک کسدی یولوم هجرین
متاع عؤمرومو درد فراقین وئردی تالانه

صورو شما نی کیمی جسم نزاریم بند بندیندن
کی سوزایله صیزیلدار بو مشبک جسم مستانه

شباین من حدیثین تک آغیزلاردان ائشیتدیم حیف
کتاب قصه عؤمروم اولوب افسون و افسانه

اوشاق لار باخ دوشوب «فردی» دالینجا های و هوی ایله
ننجه گؤر دلبرین عشقی سنی ائیلیدی دیوانه

بوشعره گئت صله بیر بیت «راجی» دن سوال ائيله
اوتور «فردی» در خرگاه اوستادیندا طفلانه:

«خیالی سینهدده گؤیلوم ایاق آلتیندادیر راجی
اوتورماز صدرده مهمان اولاندا صاحب خانه»